



Broj: 01/2-04-3369-2/21
Datum: 18.07.2022.godine

Na osnovu Sporazuma o saradnji potpisanog od strane nevladine organizacije "Muslim Aid Association" (u daljem tekstu MAA) i Općine Breza (u daljem tekstu Općina), broj 01/2-04-3369-1/21 od 15.12.2021. godine, u cilju realizacije projekta „Ekonomsko osnaživanje socijalno i materijalno ugroženih osoba i mladih osoba kroz proizvodnju povrća u plastenicima“, na području općine Breza, Općinski načelnik donosi

PRAVILNIK

O UTVRĐIVANJU USLOVA, KRITERIJA I POSTUPAKA ZA OSTVARIVANJE PRAVA ZA DODJELU PLASTENIKA I OPREME U PROJEKTU "EKONOMSKO OSNAŽIVANJE SOCIJALNO UGROŽENIH OSOBA I MLADIH OSOBA KROZ PROIZVODNJU POVRĆA U PLASTENICIMA"

I OSNOVNE ODREDBE

Član 1.

Ovim Pravilnikom utvrđuju se uslovi, kriteriji i postupak za ostvarivanje prava za dodjelu 20 plastenika od 100 m² sa sadnim/sjemenskim materijalom, sistemom za navodnjavanje i dodatnom opremom kroz projekat „Ekonomsko osnaživanje socijalno ugroženih osoba i mladih osoba kroz proizvodnju povrća u plastenicima“ kojim su osigurana donatorska sredstva od strane nevladine organizacije Muslim Aid Association 40 %, Općine Breza 40 %, osigurana u Budžetu Općine Breza za 2022. godinu i vlastitog učešća korisnika 20 %, a u cilju nabavke i dodjele plastenika i opreme, na području općine Breza (u daljem tekstu: Projekat).

Član 2.

Pravo na učešće u Projektu imaju socijalno i materijalno ugrožene osobe i mlade osobe sa područja općine Breza koje posjeduju vlastito poljoprivredno zemljište ili zemljište u vlasništvu članova uže porodice po prvoj liniji (majka, otac, djed...), kao i zemljište ustupljeno na korištenje ili u zakup u neposrednoj blizini stambenog objekta u kojem stanuju.

Pravo na dodjelu plastenika sa dodatnom opremom nemaju lica koja su dobila donaciju iz oblasti poljoprivrede od općine, nadležnih ministarstava, humanitarnih i drugih organizacija u zadnjih tri godine. Pravo učešća nemaju članovi uže porodice zaposlenika Muslim Aid Association i Općine Breza.

II PRAVA UČEŠĆA I USLOVI ZA DODJELU PLASTENIKA 100m² SA DODATNOM OPREMOM, SISTEMOM ZA NAVODNJAVANJE, SADNIM I SJEMENSKIM MATERIJALOM

Član 3.

Podnosilac prijave treba da ispunjava sljedeće uslove:

- da je nezaposlena osoba ili osoba sa minimalnim primanjima ili mlada osoba u dobi od 18 do 35 godina, sa prebivalištem na području općine Breza,
- da je nosilac ili član poljoprivrednog gazdinstva u Registru poljoprivrednih gazdinstava i Registru klijenata FBiH,
- da je podnosilac zahtjeva ili član uže porodice vlasnik ili posjednik poljoprivrednog zemljišta pogodnog za plasteničku proizvodnju ili da je poljoprivredno zemljište pogodno za plasteničku proizvodnju uzeto na korištenje ili u zakup i da se isto nalazi u neposrednoj blizini stambenog objekta u kojem stanuju,
- da postoji mogućnost navodnjavanja plastenika,
- da u trenutku prijave za učešće u ovom projektu nema više od 100 m² plastenika u svom posjedu ili posjedu užeg člana domaćinstva,
- da će sufinansirati 20% (630,00 KM) od nabavne cijene plastenika sa dodatnom opremom,
- da obavezno prisustvuje edukaciji iz oblasti plasteničke proizvodnje u trajanju od dva dana,
- da u posljednje tri godine nije ostvarivao-la pravo na donaciju u mehanizaciji i opremi za poljoprivrednu proizvodnju, od općine/grada, nadležnih ministarstava, humanitarnih i drugih organizacija,
- da će dodijeljeni plastenik zadržati u vlasništvu najmanje 3 godine od potpisivanja ugovora.

III KRITERIJI ZA BODOVANJE PODNOSIOCA ZAHTJEVA

Član 4.

Kriteriji za bodovanje podnosioca zahtjeva:

a) Pogodnost poljoprivrednog zemljišta za plasteničku proizvodnju i mogućnost navodnjavanja (utvrđuje Komisija za dodjelu plastenika na licu mjesta) **1-3 boda,**

1. slabi uslovi (veliki nagib-preko 10°, udaljenost od kuće više od 500 m ali ne više od 1000 m, parcela vrlo malo osunčana) **1 bod,**
2. dobri uslovi (relativno veliki nagib, do 10°, udaljenost od kuće do 500m, parcela realtivno dobro osunčana) **2 bodova,**
3. jako dobri uslovi (blag nagib, do 5°, udaljenost od kuće do 200, dobar pristup, parcela osunčana) **3 bodova.**

Napomena: Kandidati kod kojih se na terenu utvrdi da parcele ne ispunjavaju gore navedene pogodnosti ili nemaju mogućnosti za navodnjavanje plastenika ili su podložne jakim udarima vjetrova neće se bodovati, te se njihove prijave neće uzeti u razmatranje. Također, ukoliko je plastenik udaljen od kuće putnom komunikacijom više od 1000 m kandidat će biti izuzet iz dalje selekcije. Za parcele za koje komisija utvrdi da nisu pogodne za plastičnu proizvodnju (izlomljen teren, fizička prepreka za postavku plastenika, neadekvatno zemljište, nepoljoprivredna parcela, podložnost jakim udarima vjetrova), kandidat se u daljem postupku Javnog poziva neće bodovati i biće eliminisan.

b) Dodatni bodovi po osnovu pripadnosti jednoj od dole navedenih kategorija:

- podnosilac zahtjeva nezaposlen **4 boda,**
- za svakog punoljetnog nezaposlenog člana porodice, koji se nalazi na evidenciji nezaposlenih osoba Biroa za zapošljavanje **1 bod**
- za svakog izdržavanog člana porodice (nezaposlene osobe koje se ne nalaze na evidenciji nezaposlenih osoba na Birou za zapošljavanje - domaćice, djeca, učenici i sl.) **1 bod**
- podnosilac zahtjeva mlada osoba životne dobi do 35 godina **4 boda**
- ako je podnosilac zahtjeva samohrani roditelj **3 boda**
- ako je podnosilac zahtjeva ili uži član domaćinstva (dijete ili bračni drug) osoba sa invaliditetom **3 boda.**

c) Ukupan prihod domaćinstva:

- bez primanja **6 bodova**
- ako su primanja po članu domaćinstva od 0,00 KM do 100,00 KM **4 boda**
- ako su primanja po članu domaćinstva od 100,00 KM do 150,00 KM **3 boda**
- ako su primanja po članu domaćinstva od 150,00 KM do 200,00 KM **2 boda**
- ako su primanja po članu domaćinstva od 200,00 KM do 300,00 KM **1 bod**
- ako su primanja po članu domaćinstva preko 300,00 KM **0 bodova.**

d) Socijalni aspekt (stanje na terenu, imovno stanje, opći dojam i sl.) od 0 - 7 bodova (utvrđuje komisija za dodjelu plastenika izlaskom na teren)

Kada kandidati pri bodovanju imaju isti broj bodova, prednost će imati kandidati koji imaju status mlade osobe, nakon toga višečlane porodice i veći broj nezaposlenih u porodici.

IV POTREBNA DOKUMENTACIJA

Član 5.

Podnosioci zahtjeva trebaju priložiti sljedeću dokumentaciju:

1. Aplikacijski formular za prijavu na Javni poziv preuzima se u šalter sali Općine Breza,
2. Potvrda o prebivalištu (CIPS prijava) ili ovjerena kopija lične karte,
3. Ovjerena kućna lista,
4. Dokaz o nezaposlenosti svih punoljetnih članova zajedničkog domaćinstva izdat od

Biroa za zapošljavanje, a za lica koja se ne vode na evidenciji kopija zdravstvene knjižice ovjerena izjava kojom se garantuje da je lice nezaposleno,

5. Kopija potvrde o upisu u Registar poljoprivrednih gazdinstava i Registar klijenata (RPG i RK) izdata od nadležne općinske službe ukoliko je kandidat upisan u Registar poljoprivrednih gazdinstava. Ukoliko nije potrebno je dati izjavu da će se ukoliko ostvari pravo na donaciju upisati u što skorijem periodu,
6. Potvrde iz škole/fakulteta (ovjera tekućeg semestra u indeksu ili potvrda o pohađanju za studenta; za učenike moguće kopija prve strane đачke knjižice) za djecu/izdržavane članove domaćinstva (za djecu predškolskog uzrasta priložiti rodni list),
7. Uvjerenje ili drugi dokaz o visini prihoda za svakog zaposlenog člana domaćinstva sa kućne liste (za penzionere posljednji ček od penzije ili potvrda izdata od banke),
8. Dokaz da je samohrani roditelj (smrtni list ili dokaz o razvodu braka ili drugi dokument kojim aplikant može dokazati da je samohrani roditelj),
9. Vlasništvo ili posjed nad parcelom koja se namjerava koristiti za instaliranje plastenika (kopija ZK izvadka ili Posjedovnog lista, kao i ugovor o zakupu/korištenju parcele),
10. Dokaz da je podnosilac zahtjeva i/ili član domaćinstva (dijete, bračni drug sl.) osoba sa invaliditetom (potvrda ili drugi dokument kojim se dokazuje da je član domaćinstva osoba sa invaliditetom),
11. Ovjerena izjava da u trenutku predaje zahtjeva za učešće u ovom pozivu nema više od 100 m² plastenika u svom posjedu ili posjedu užeg člana domaćinstva,
12. Ovjerena izjava da će korisnik podsticaja dobijeni plastenik zadržati u vlasništvu najmanje 3 godine od potpisivanja Ugovora,
13. Ovjerena izjava da podnosilac zahtjeva u posljednje 3 godine nije ostvario pravo na donaciju, dodjelu ili sufinansiranje nabavke plastenika od općine/grada, ministarstava, humanitarnih i drugih organizacija,
14. Ovjerena izjava da će sufinansirati 20% od nabavne cijene plastenika sa dodatnom opremom (630,00 KM), te da će obavezno prisustvovati edukaciji iz oblasti plastičke proizvodnje u trajanju od dva dana.

Potrebna izjava za uslove pod rednim brojevima 11.,12.,13.,14. se podnosi na zajedničkom obrascu „IZJAVA“, koja se može preuzeti u šalter sali Općine Breza.

Ukoliko se prilikom bodovanja kandidata utvrdi nedostatak dokumentacije iz gore navedenih stavki, kandidat će biti eliminisan iz dalje procedure odabira za dodjelu plastenika.

Komisija zadržava pravo provjere dokumentacije ukoliko sumnja u vjerodostojnost dostavljenih dokumenata.

IV OBJAVA JAVNOG POZIVA I IZBOR KANDIDATA

Član 6.

Općina Breza objavljuje javni poziv za dodjelu plastenika. Javni poziv se objavljuje na web stranici Općine Breza www.breza.gov.ba, te na oglasnoj ploči Općine, a bit će otvoren 15 dana od dana objave. Javni poziv sadrži uslove i kriterije koje kandidat mora ispunjavati, potrebnu dokumentaciju i krajnji rok za prijavu.

Izbor kandidata za dodjelu plastenika vrši Komisija na osnovu uslova i kriterija iz ovog Pravilnika.

Član 7.

Komisiju za odabir korisnika za dodjelu plastenika sa pratećom opremom imenuje Općinski načelnik, a koja se sastoji od najmanje 3 člana od kojih su dva člana predstavnici Općine Breza a jedan član predstvanik Organizacije Muslim Aid Association.

Zadatak Komisije je:

- pregled prispjelih prijava,
- evidentiranje kandidata koji ispunjavaju uslove iz javnog poziva,
- obavljanje uviđaja na licu mjesta,
- izrada zapisnika o radu i sačinjavanje rang liste korisnika na osnovu utvrđenih kriterija za bodovanje,

Rang lista odabranih kandidata se objavljuje na oglasnoj ploči Općine Breza i službenoj web stranici Općine Breza.

Na predloženu rang listu, korisnici imaju pravo žalbe u roku 5 dana od dana objave na naprijed nevedenim adresama. Žalba se podnosi pismenim putem sa tačnim obrazloženjem Komisiji putem protokola Općine Breza.

Konačna rang lista dostavlja se Općinskom načelniku na saglasnost.

Član 8.

Između NVO Muslim Aid Association, Općine Breza i odabranih korisnika zaključit će se tripartitni ugovori kojim će biti regulisana međusobna prava i obaveze učesnika u ovom Projektu.

Član 9.

Pravilnik stupa na snagu danom donošenja.

Predlagač:

Služba za privredu

Salih Hasanspahić

Obrađivač:

Almin Operta

DOSTAVLJENO:

1 X Muslim Aid, Koševo 10 Sarajevo

1 X Oglasna tabla Općine Breza

1 x Web stranica Općine Breza

1 x Služba za privredu

1 x Radio Breza

1 x Služba za zapošljavanje Ze-Do kantona, Biro Breza

1 x a/a

OPĆINSKI NAČELNIK

Vedad Jusić